



Sin il program è er stà in exercizi da sajettar cun ils divers chars armads.

FOTOS G. N. STGIER

## «En il futur anc dapli muntada»

50 onns piazza da tir Valragn

DA GION NUTEGN STGIER / ANR

■ **In cler confess tar la regiun e tar la piazza da tir è che la confederaziun investescha fin il 2018 bunamain sis milliuns francs per modernisar ed engrondir quella. Valragn ha bain la canera, dentant è la valorisaziun dal militar gronda e quai per l'entira regiun.** Per venderi aveva la confederaziun envidà la populaziun da Valragn e conturn, las instanzas politicas ed anteriurs uffiziers e schuldads a la festa da giubileum 50 onns piazza da tir. Vegnids en tuts en grondas rotschas e quai dal pli giuven fin tar il veteran. L'occurrenza ha attratg in vast public ed a medem temp er testiftgà che nosa armada è anc adina in vair magnet. Passa 500 personas en s'interessadas per ils numerus chars armads, per la lavur da la schuldada e per l'entir manaschi da militar a Valragn.

### Gia il 1938 ils emprims exercizis

Il colonel e cumandant dal center da scolaziun, *Matthias Bellwald*, ha dà in sguard en l'istorgia da la piazza da tir da Valragn. El ha ditg che gia il 1938 hajan gi lieu en quella regiun ils emprims exercizis da sajettar e quai da l'infantaria sco er da l'artiglieria. Pausc mais suentar la Segunda Guerra mundiala saja la Val en il vest da Valragn daventada in lieu da scolaziun e da tir. Cun chars armads saja vegnì tratg l'emprima giada il 1959 e quai tiers la malaviglia da la populaziun. Il departament da militar, da lez temp cun cusseglier federal Paul Chaudet (mort 1977) saja lura sa

convegner cun la vischnanca Valragn, cun il Club Alpin Svizzer e cun la vischnanca da Mesocco e cumprà il terren da 925 hectaras per construir la piazza da tir. Ils 4 da fanadur 1965 saja vegnida sutscritta la cunvegna tranter ils dus partenaris. Cun l'avertura dal San Bernardino il 1967 e grazia a la via nazionala saja la piazza da tir vegnida anc pli accessibla. Ils davos tschintg decennis saja adina vegnì investè en quella piazza da tir. Quai fetschia la confederaziun er ils proxims trais onns cun modernisar, engrondir l'areal da militar e sanar la centrala da commando.

### La piazza da tir ha divers aspects

Da la partida a la festa da giubileum 50 onns piazza da tir Valragn è er stà il president communal *Georg Trepp*. Quella piazza da militar haja divers aspects, dad ina vart la canera, l'inquietezza e las emissiuns e da l'autra vart lura l'aspect economic cun profitar blers affars, ustrias ed hotels dal militar. Ultra da quai saja grazia a la schuldada er dapli vita en la regiun. En il fratemp tutga la piazza da tir tar Valragn, accentuescha *Georg Trepp*. Oz saja bain donn che da lez temp aajan la vischnanca e la confederaziun sa convegnoidas per ina contribuziun unica e betg per in contract che cuzza sur pli onns.

### La collavuraziun populaziun ed armada è exemplarica

Per cusseglier guvernativ e schef dal departament da militar, polizia e sanadad *Christian Rathgeb* è la piazza da tir da Valragn da gronda impurtanza per l'avegnir. Cun mi-

dar la Brigada mecanisada 11 ses lieu da domicil da Winterthur a Cuir saja da gronda impurtanza dad avair a disposiziun ina piazza da tir sco quella da Valragn. Ultra da quai saja quella piazza da tir er da gronda valur per la populaziun e dal reminent saja la collavuraziun da l'armada cun la populaziun, cun las instanzas politicas regiunalas e chantunalas fig buna, ha ditg *Christian Rathgeb*. La creaziun da valur saja er fig gronda (45 000 pernottaziuns) e grazia al militar hajan tuttina anc blers lavur.

### Valragn fin Tusaun

L'armada svizra ha radund 270 chars armads e da quels en 20 staziunads permanent a Valragn. Tut tenor grondezza paisa in char armà tranter 55 e 65 tonnas. In da quels custa radund in milliun francs. In sulet culp costa 1000 francs e dapli, ed il culp ha ina sveltezza da 1600 meters fin 1800 meters per secunda. Cun in sulet culp èsi pussaivel da disfar ina chasa dad ina famiglia. Thun e Bure en ils lieus principals per las scolas da recrut da la truppa chars armads. Ils radund 20 000 schuldads che fan militar tar quella truppa appartegnan a duas brigadas. En cumparaziun cun auters chantuns, cunzunt cun quels da la Svizra centrala e dal vest, ha il Grischun pauc schuldads che fan lur servetsch militar tar la truppa dals chars armads.



Colonel Lorenzo Rampa (san.) ed adjutant Jürg Gartmann.



In schuldà è anc occupà cun las davosas lavurs.



Infurmaziuns directas per quels dus mats.



Quel mattatsch vuleva betg pli sortir dal char armà.



Georg Trepp (san.), il president communal da Valragn cun brigadier René Wellinger, il cumandant da la furmaziun e da scolaziun chars armads ed artiglieria.



Il cumandant da l'armada e cumandant dal corp Dominique Andrey (dretg) salida in da ses anteriurs uffiziers.